

րունակեցին անընդհատ մինչեւ Ս. Սահակի կաթողիկոսութեան օրերը, այնքան խռրապէս արմատացեր էին կղերին և ժողովրդեան մէջ, որ մինչեւ իսկ սուրբ հայրապետը, իր բոլոր եռանդով և աստուածային հոգեով, իր երկաթի կամքով ու ճիգերով, անկարող եղաւ անմիջապէս արմատախիլ ընել զանոնք, ինչպէս կարելի է զուշակել իր կանոններէն: Ան ստիպուեցաւ ամէն կարելի միջոցներ ձեռք առնել, սաստիկ ու դառն յանդիմանութիւններ տեղալ անոնց գլխուն, եկեղեցական խիստ պատուհասներ սպառնալ անոնց որ զանցառու գտնուէին իր հրամաններուն դէմ: Դժբախտաբար այս բարոյական կեղը ճարակեր էր ոչ միայն աշխարհիկ մարդոց մէջ, այլ նոյն իսկ կղերական դասին, ուսկից զերծ չէին մինչեւ անգամ եպիսկոպոսները, որոնք զեղծանելով իրենց աստիճանին իշխանութեամբ, և օգտուելով մանաւանդ նախորդ հոգեւոր պետերուն թոյլ և աղիկամի վարչութիւնէն, կը շարունակէին իրենց ապօրինի գործերը, առանց խորհելու բնաւ, թէ այլ եւս կաթողիկոսական աթոռին վրայ՝ Չաւէն մը կամ Ասպուրակէս մը չէր որ բազմած էր, այլ Ս. Սահակ Պարթեւ մը, Լուսաւորչի թոռան թոռնորդին, Ս. Ներսէսի հարազատ զաւակը, աստուածային հոգեով և նախանձով վառուած հայրապետ մը, որ Քրիստոսի հետ կ'ըսէր ու կը կրկնէր. «Նախանձ տան քո կերիցէ զիս»:

1. — Ան իր կանոններուն առաջին գլուխը կը նուիրէ եպիսկոպոսներուն, զորս «այցելու և հասարակաց հայր»¹ կը կոչէ. անոնք դժբախտաբար իրենց բարձր աստիճանին պարտականութեանց անգիտակ և անփոյթ, յաճախ քահանայ կը ձեռնադրէին անարժան, մոլի և տգէտ անձեր, և նոյն իսկ գոհճիկ զինուորներ, որոնք կամ իրենց ազգականներ էին, և կամ կրնային նիւթական շահերու և միջոցներու ազդիւրներ հայթայթել իրենց, այնպիսի-

ներ վերջապէս՝ որ ո՛չ քահանայական աստիճանին յարգը զիտէին, և ո՛չ ալ Ս. Խորհուրդներուն տարրական գիտութիւնն ունէին: Անոնց դէմ է՝ որ Ս. Սահակ կը բարձրացնէ ուժգին իր ձայնը, կը բողոքէ և կ'արգիլէ խստիւ, «Մի՛ ոք զայսպիսի տեսչութիւնս՝ զինուորաց կամ տգիտաց հաւատացէ, և մի՛ մերձաւորաց իւրոց՝ շնորհուկս ինչ առնելով»²: Սակայն այդ մեղմ ու թեթեւ յանդիմանութեամբ գոհ չըլլալով, որ անկարող էր թեքելս ցնցելու և զգաստացնելու այն սալացած սըրտերը, աւելի խիստ ու սաստող շունչ մը կու տայ իր խօսքերուն, կշտամբելով զիրենք, թէ «փարիք զտոհմային զազգահանօք, պէսպէս հնարելով հնարս՝ զի զիրգ և փափուկ առնիցէք, և առաւելստացու թեամբն զեղուցուք զտունսն»³: Կը պատուիրէ անոնց, որ հրեշտակալրօն վարք մ'ունենան իրրենց սուրբ աստիճանին վայել ու յարմար, կատարեն առանց աչառութեան իրենց պաշտօնը, պարկեշտ ու պատուիրանապահ կեանք մ'ունենան՝ ի շինութիւն իրենց ստորակարգ պաշտօնեաներուն, հեռի կաշառքէ ու ընչասիրութենէ: Մինչ «դուք, կ'աւելցնէ, յընչասիրութիւնս և ի կաշառս կործանիք, և զգարշելիսն և զպատուիրանագանցսն և զզինուորսն և զտգէտսն հաւատարիմ համարիք ի գործ սպասաւորութեան եկեղեցւոյ, և ջոլիրս եւս յաճախեալս տողէք զկնի ձեր զմերձաւորացն անուանելոց»⁴: Եպիսկոպոսներուն ո՛չ նուազ կարեւոր և փափուկ պարտականութիւն մ'էր դարձեալ, հաւատացեալներէն իրենց յանձնուած զանձերն ու զբամները պահել ամենայն հաւատարմութեամբ իբր սրբազան աւանդ և հսկել խղճով որ եկեղեցիներուն, վանքերուն և աղքատներուն կարեւոր պէտքերուն միայն գործածուէին, մինչ իրենք յաճախ անձնական վայելքներուն կամ հաճոյքներուն համար կը վատնէին այն զբամները և կամ իրենց ազգականներուն

1. Կանոնք Ս. Սահակայ. Ա. էջ 71.

2. Անդ. Բ. էջ 72.

3. Անդ. էջ 74.

4. Անդ. Ե. էջ 77-78.